



東華續錄

光緒七十七

臣朱壽朋敬編

臣章圭瑒恭校

六月甲子張凱嵩奏貴州剝隘等處火災分別委勘籌款撫恤情形得旨據奏剝隘等處火災業經委

員查勘籌款撫恤仍著督飭各員分別輕重認真辦理○乙丑劉錦棠奏新疆南路建置已定請飭提

督迅卽移防以資整理從之○丙寅諭張家口監督錫光奏差滿回京短收盈餘銀兩請減成賠繳一摺

著戶部核議具奏○庚午東閣大學士閻敬銘因病乞休不允命賞假一月○辛未吳大澂等奏臣等竊

思琿春與俄國交界地方有界限不清之處因咸豐十一年前戶部侍郎成琦會同俄員建立木界牌八

處其末處土字界牌最關緊要不知何年毀失徧詢土人無從查究查琿春轄境處處與俄接壤臣依克

唐阿到任後查閱邊界自琿春河源至圖們江口五百餘里竟無界牌一箇黑頂子山瀕江一帶久被俄

人侵佔屢與臣吳大澂照會俄員索還佔地並迭次面商據約辯論該俄員等一味支吾延宕竟於黑頂

子地方添設卡兵接通電綫有久假不歸之意旋經吉林將軍臣希元專派協領穆隆阿雙壽等約同俄

員會勘僅至沙草峯爲俄人所阻未經勘畢而回臣等此次會同俄國所派勘界大臣巴啦諾伏等商議

界務首重立土字牌交界之處次則歸還黑頂子要隘之地據俄員舒利經指出成琦所換地圖上界綫盡處卽咸豐十一年原立土字界牌之所江東有大泡子積水爲記江西與朝鮮偏險城相對該員舒利經卽係當時親自繪圖監立界牌之人言之確鑿並呈出大小圖稿一牌有一牌之圖沙草峯所立土字界牌似非無據臣等詳查咸豐十一年所換地圖內英尺一寸係俄國里二十五里中國里五十里圖上界綫末處與海口相距幾及一寸係俄里二十餘里以中國里數計之實係四十五里惟咸豐十年條約內云兩國交界與圖們江之會處及該江口相距不過二十里咸豐十年交界道路記文內亦云圖們江左邊距海不過二十里立界牌一箇上寫俄國土字頭現查十一年所立土字界牌之地並未照准條約記文二十里之說臣等與俄員巴拉諾伏反覆辯論該員以爲海灘二十里俄人謂海河除去海河二十里方是江口臣等以爲江口卽海口中國二十里卽俄國十里沙草峯原立土字界牌旣與條約記文不符此時卽應照約更正巴拉諾伏仍以舊圖紅綫爲詞堅執不允此四月二十二日與俄員議立界牌力爭未決之情形也此外尙有應辦事宜數端舊圖內拉字那字兩牌之間有瑪字界牌記文則缺而未立條約內怕字土字兩牌之間有啦薩兩字界牌地圖記文略而不詳現應補立者一也舊立木牌年久易於朽壞鄉民有燒荒之例野火所焚延及牌木難免燬損改用石碑較爲堅固亟應換立者二也兩國交

界地段太長牌博中間相去甚遠路徑紛歧山林叢雜本未立牌之地難免越界之人自宜酌擇要地多立封堆挖溝爲記愈密愈詳此應辦者三也俄人所佔黑頂子地方設有俄卡現應補立土字界牌該處在紅綫界內臣依克唐阿當卽派員前往接收添設卡倫以清界址此應辦者四也俄員舒利經現畫分圖以英尺一寸爲俄國一里計中國二里較舊圖尤爲細密臣等與該員詳加考核分註漢文俄文應將此圖畫押鈐印中俄各存一分以補舊圖之不備此應辦者五也以上各條均於四月二十六日復議界務時臣等與俄員巴啦諾伏詳細妥商各無異議惟補立土字界牌一節再三辯駁始允於沙草峯南越嶺而下至平岡盡處豎立土字牌以江道計之兩舊圖展拓十八里逕直里數不過十四里臣等派員前往測量該處距圖們江出海之口順水而下爲中國里三十里計俄里十五里陸路直量爲中國里二十七里計俄里十三里半臣等自奉諭旨允准後卽於五月十九日約同俄員巴啦諾伏及舒利經克拉多馬秋寧等前赴圖們江議立界牌之地親自勘明於二十日將土字石牌公同監立並用灰土石片深埋堅築以期經久所擬記文應寫滿文漢文俄文各二分另繪分圖於六月初七日續寫完竣臣等卽於是日在巖杵河俄館會同勘界大員巴啦諾伏等畫押鈐印訖將記文地圖各一分由吳大澂回京覆命時面交總理各國事務衙門王大臣存案備查又奏圖們江土字界牌以南至海口三十里雖屬俄國

轄境惟江東爲俄界江西爲朝鮮界江水正流全在中國境內中國如有船隻出入海口非俄國一國所能攔阻臣等與巴啦諾伏商議數次該使總以奏請俄廷示諭爲辭應俟商妥後再行定議又甯古塔境內倭字那字兩界牌均與記文條約不甚相符臣等畫押事竣擬再赴三岔口一帶將倭字那字二界牌查勘明確如應更正之處再與巴啦諾伏等妥商辦理合併陳明奏入報聞○壬申雨○欽奉 慈禧端佑康頤昭豫莊誠皇太后懿旨前因皇帝沖齡踐阼一切用人行政王大臣等不能無所稟承因准廷臣之請垂簾聽政並諭自皇帝典學有成卽行親政十餘年來皇帝孜孜念典德業日新近來披閱章奏論斷古今剖決是非權衡允當本日召見醇親王及軍機大臣禮親王世鐸等諭以自本年冬至大祀 圖丘爲始皇帝親詣行禮並著欽天監選擇吉期於明年舉行親政典禮皇帝聞諭後當卽長跪懇辭醇親王及軍機大臣亦以時事多艱萬幾鉅繁皇帝日就月將學無止境如蒙從緩將來躬親庶務必更能貫徹無遺益臻上理實爲天下臣民之幸再三籲懇情詞亦出至誠惟念垂簾之舉本屬一時權宜皇帝繼統御極仰承 穆宗毅皇帝付託之重當此典學有成正宜與內外臣工勤求治理宏濟艱難自應欽遵同治十三年十二月初七日懿旨卽行親政以慰深宮期望之意 壇廟大祀均應親詣行禮以昭誠敬卽於本年冬至大祀 圖丘爲始躬親致祭並著欽天監於明年正月選擇吉期舉行親政典禮所有

應行事宜及應復舊制之處著各該衙門敬謹查照成案奏明辦理將此通諭中外知之○剛毅奏查光緒十年四月間升任撫臣張之洞以綠兵積弊已久建議分立三軍四軍旋准部議以餉鉅難籌令照例定俸廉餉乾等項免扣成平全數動用儘此例支銀米另議餉章再行會議復經前署撫臣奎斌遵議仿照直隸章程就餉練兵並臚陳沙汰老弱簡練精壯酌裁官員刪併塘汛規復額餉綜校盈虛六條奏奉諭旨該部議奏欽此經兵部戶部會議覆奏十一年十一月接准咨覆行令照辦並以原議節省餉乾銀數稍有不符裁汰員弁底冊間有歧異各營公費數目亦有可減仍令詳細查覆等因咨行到晉臣到任准移當卽分咨太原大同兩鎮刻期舉辦並飭清源局司道確稽餉數分別核議去後查晉省兵氣素弱庫藏無餘既議練兵復籌節餉二者並舉計乏兩全前署撫臣就原有餉需設法撙節爲抽練之計固已煞費經營然究爲餉數所拘兵力所限欲求處處周備實亦勢有所難惟臣竊以此舉有關晉省兵制全局雖非盡變舊章然就額餉以練主兵原欲策自強而規久遠若留罅漏於此日必費補苴於將來故擬量爲變通務使益臻精密論全皆形勢原屬北重於南歷前撫臣固詳言之矣臣以此爲不刊之論是原定北鎮應設各營旗實已無可議省標居中權之地既不臨邊又無分汛之責原定設親軍馬步合隊一營步隊兩營馬隊一營萃於一城略嫌偏重是以臣於抵晉之初卽將省標原有親軍馬步練兵一百

五十人奏明全數裁遣原營底額概不募補通年計可節省底餉底乾二千七百六十七兩零並將原定此數練兵案內應設之親軍馬步合隊一營二百人全行刪除通年復可節省薪公練餉練乾銀一萬二百餘兩東路潞澤一帶控制大行界連豫直邊隘林立山徑分歧原議僅於潞安府設步隊一旗沿邊千有餘里不免有地廣兵單之虞臣擬於澤州府添設步隊一旗計通年應增乾餉銀八千六百八十九兩零仍於蒲州府原設步隊一營五百人裁去一百人改爲一旗計通年可省練餉銀五千七百一十六兩又原議於運城設馬隊一旗平陽府設馬隊一旗汾州府設步隊一旗此三處皆爲省南扼要之區然運城居平陽之南汾州居平陽之北運城旣設馬隊則平陽宜設步隊汾州宜設馬隊似應將原設平陽府馬隊改設汾州卽以汾州府原設步隊改設平陽庶幾馬步相間聲氣相聯而於原定兵數餉數仍無出入統計此次就餉練兵撫標挑練馬隊一旗步隊兩營太原鎮挑練馬隊二旗步隊四旗大同鎮挑練馬隊七旗步隊一營較之原設刪除撫標親軍馬步合隊一營二百人刪除蒲州府步隊二百人添設澤州府步隊一旗三百人餘均與原設相同其營制餉章駐紮處所亦悉如奎斌前奏由各該鎮照數編立均於十二年正月初一日一律成軍原有各練營應支餉乾亦均於是日截止至應裁馬步各兵自光緒十年正月起至十一年二月止共裁省標兩鎮馬步額兵四千三百六十名臣接辦後續裁省標馬步兵一

百五十名太原鎮各營塘汛兵一千名大同鎮塘汛兵四百名前後共裁馬步兵五千九百一十名官馬三百一十三匹通年節省裁兵餉乾米豆等銀七萬九千三百兩零裁減官弁六十八員除改設守備以下十八員實裁都司六員守備一員千總七員把總二十三員外委十三員共五十員例馬八十八匹官馬一十三匹均於十一年十二月底與新裁塘汛各兵一律停支俸餉通年節省裁官俸養廉餉乾五千八百三十一兩零酌減綠營公費銀八百六十八兩零合之議准規復成平銀一十萬六千八百二十五兩零通計每年節省規復可備練兵之需者實共銀一十九萬二千八百四十六兩有奇今就所練各營旗應支薪公練餉練乾核算通年實需銀一十六萬八千四百七十兩有奇並兩鎮分統公費銀二千五百兩每年尙餘銀二萬一千九百七十兩有奇其餘雜支應以軍火爲大宗歲修營房次之冬防煤炭又次之卽照正項一成計算每年尙可餘銀數千兩以備修造軍裝卹賞等用亦屬有盈無絀應請隨時核實支銷如有盈餘報部候撥由清源局司道確核各項細數詳請具奏前來臣查綠營錮弊頹弱成風至此時而已極今創此加餉整軍之議冀收安邊固圉之功若一任惰廢因循必致踵弊蹈欺虛耗度支於武備仍無實際臣自當慎選將領嚴督操防務使兵氣日強懦氣漸振庶緩急足恃而成效可期如查有廢弛營伍任令兵丁技藝生疎以及濫給名糧虛曠攤扣等弊卽由臣將營哨各官從嚴參辦並將分統

之員一併奏參所有北軍馬隊五百人樹軍馬步一千二百人皆係客勇部議原限一年後遣撤當此經費支絀之時但有可裁之兵可省之餉自宜力求撙節現已另片陳明將北軍馬隊五百人先行撤遣其樹軍各營分紮北路緝匪巡防深資得力現在各營甫經集練未能一律精強統俟一年後再由臣酌量情形奏明辦理下部知之○癸酉頒給浙江海寧州城隍廟匾額○予河南祥符縣節婦朱李氏旌表

○甲戌雨○乙亥以霽解甘肅餉糈出力予河南布政使孫鳳翔等獎敘有差○劉秉璋奏臣蒞任之初卽據紳士僉言海塘等工年久失修勢甚岌岌必得趕緊修復以免後患維時卽擬設法辦理乃值海防喫緊費無可出不得不暫置緩圖兩年以來潮汐衝刷坍塌愈甚日前海防事宜正在籌議間卽據該縣紳民呈請建復石塘以資捍衛情詞甚爲迫切當飭塘工總局行知會辦局務杭州府知府吳世榮提調候補知府童光澤等確切查勘去後茲據覆稱向繞城棠字號十八丈起至羌字號十五丈止魚鱗大石塘六百十三丈及迤北之添字號二十丈起至翔字號五丈止中條石塘一千三百六十五丈現均完整其魚鱗塘之北棠字號二丈起至中條石塘之南翔字號十五丈止原建大石塘三百七十七丈率多淤損完整者不過十分之一自繞城之南羌字號五丈起至空字號五丈止原建大石塘一千八百七十丈間有淤損完整者不過十分之二自空字號十五丈起至傳字號五丈止原建新條石塘四十丈亦多坍塌

完整者不及十分之一自傳字號十五丈起至習字號十五丈止原建高矮石塘七十丈均已坍卸至底又自習字號五丈起至秦駐山脚壁字號十五丈止原建低矮石塘一百八十丈均已坍卸無存其秦駐山迤南自青山脚非字號二十丈起至長牆山脚曰字號十八丈五尺止原建小塊石塘二百十八丈五尺亦皆坍卸至底總計應行修建石塘二千餘丈若一律興辦工多費巨勢難舉行自應擇要估辦以紓財力悉心籌度審察情形內自短字號二十丈起至傳字號五丈止大石塘七百二十五丈新條石塘四丈潑損數層或坍卸至底該處地勢灣環秦駐山當其右承受西北風頂衝外逼大海內靠白洋河僅倚一綫土堤爲固每屆秋潮盛漲風大浪高居民異常驚恐係屬刻不可緩亟應修復之工按號勘估其僅潑損決裂而椿脚未動者五百丈擬請仍用原石埋砌完整內有低矮段落請分別酌量加高一二層以資抵禦其坍卸至底椿朽不堪承受者二百六十五丈擬請一律補椿添用新木拆底修砌完固惟有原建大石塘舊石寬一尺六寸厚一尺五寸今若照樣採買興辦工本既重運脚亦鉅擬請仿照三防魚鱗塘石樣寬一尺二寸厚一尺者採購添用以節經費其傳字號十五丈起至習字號十五丈止坍卸高矮石塘七十丈現存舊石約有二成可以抵用又習字號五丈起至善字號二十丈止坍沒低矮石塘二百二十五丈舊石無存僅有基址據工人云當時建築因節省工料堅固不如大石塘以致不能經久今若

照舊做法需費未免過鉅擬請將前兩段石塘一百九十五丈仿照三防十八層魚鱗石塘辦法一律改建以期鞏固以上共請修建石塘九百六十丈並將塘後附工一律挑築培護統計約估工料銀十九萬九千九百餘兩並據聲明此次所估工段做法銀數均就現在情形撙節核實確估將來或有審時度勢酌量增減之處隨時另行核辦等情由總局司道核明轉詳請奏前來臣查海鹽縣濱臨大海全仗石塘保衛原建四千六百餘丈積年坍塌過半經前撫臣陸續修建魚鱗大石塘二百餘丈中條石塘二百四十餘丈其餘應修各工奏明俟續籌有款再行勘辦近年秋潮旺盛奇險迭生僅有一綫土塘萬不足恃脫有不虞何堪設想下游嘉湖蘇松各郡皆農桑財富之區尤關緊要不僅海鹽一邑然也現雖財力不支而事不能已惟有擇要興辦以重要工埋砌者五百丈建復者四百六十丈共計九百六十丈應需銀十九萬九千九百餘兩尙屬核實臣以經費艱難節益求節准以約略發銀十六萬餘兩工料定以程式不准偷減一面擇日開工尅期竣事以省浮費此次並無專款釐金收不敷支無可指撥惟有前因籌辦海防兩浙商人自願接行捐輸以備急需截至上年年底隨繳存銀八萬兩此係零星湊集並不請獎似可以公濟公移作此項工程之用其餘不敷銀八萬兩擬請藩庫提銀一萬五千兩運庫提銀一萬五千兩糧道庫提銀三萬兩釐捐局提銀二萬兩分作兩年陸續解塘工局支發應用庶幾眾擎易舉以成厥

事除飭趕緊委員購料集夫興辦工竣照例造報銷外合將勘明海鹽縣境坍塌石塘等工先行擇要估修緣由恭摺具奏下部知之○丁丑醇親王奕譞奏爲 宮廷政治內外並重敬擬齊治要道仰祈 慈鑒敬溯自咸豐辛酉 兩宮垂簾聽政外戡寇亂內除權奸 德澤佈於八垓 威信敷於四裔 武功文教炳耀實區同治甲戌痛遭大故 勉允臣工之請 重舉聽政之儀自光緒辛巳以來我 皇太后憂勤益切 宵旰孜孜所以承 列聖垂統之艱造萬世無疆之福者至矣盡矣茲者 皇帝甫逾志學之年 特申親政之旨王大臣等審時度勢合詞籲懇 皇太后訓政敬祈 體念時艱 俯允所請俾 皇帝有所稟承日就月將見聞密邇俟及二旬再議 親理庶務彼時實字之局益安 皇帝心志益定實爲 宗社蒼生之福抑臣更有請者 列聖宮廷規制遠邁前代我 皇太后循守成憲嚴肅有加將來 大婚後一切典禮規模咸賴 訓教飭誠卽內廷尋常事件亦不可少弛 前徽臣愚以爲歸政後必須永照現在規制一切事件先請 懿旨再於 皇帝前奏聞俾 皇帝專心大政博覽羣書上承 聖母之歡顏內免 宮闈之劇務此則非如臣生長 深宮者不能知亦不敢言也又和碩禮親王世鐸等奏伏讀六月初六日 懿旨竊思 皇太后垂簾聽政二十餘年戡定大難撫馭萬方海澱山陬無不沾被 皇上典學有成擇期 親政四海臣民自當延頸跂踵以觀 德政之成惟 宮廷之內

一日萬幾卽天下已治已安猶煩 聖慮況目前軍務甫定亟圖自強一切整綱飭紀經緯萬端無不仰賴 慈謨冀收遠效伏讀 懿旨敬悉 皇上聞 諭後長跪懇辭籲求 皇太后從緩 歸政此臣下所未敢遽陳者 皇上已先陳於 慈宸之前臣等仰惟 皇上純孝之心豈不冀 皇太后深宮頤養稍釋憂勤特以天下之大庶政之繁多聆一日 懿訓庶多增一分 德業 嚴恭寅畏發於至誠我朝家法昭垂超邁前古伏查嘉慶元年 授 受禮成後 高宗純皇帝躬親訓政惟日孜孜臣等懷懼愚忱竊願 皇太后 光昭 前烈 訓政數年於明年 皇上 親政後仍每日 召見臣工 披覽章奏俾 皇上隨時隨事親承 指示非第用人行行政大端有所稟承卽現在一切變通整頓之事及中外交涉一切機宜皆得 躬奉 徽猷備聆 心法將來 宸謨獨斷措置裕如用成千載一時之盛治天下幸甚臣等幸甚如蒙 俞允一切應行事宜恭候 懿旨敬謹遵行又伯彥訥謨祜等奏臣等伏讀六月初十日 懿旨以 皇帝典學有成 諭於明年正月舉行 親政典禮 詔辭宏遠酌古準今尋繹回環且欽且感伏思我 皇太后躬仁聖之資值艱難之運削平九宇撫定四方史冊罕傳 功德莫二茲當 璇闈歸政 頤養沖和既大慰日夕期望之心亦稍釋 宵旰仔肩之重凡茲臣庶孰不欣愉然臣等日侍 講筵深維大局有不得不縷晰備陳者幸 皇太后垂察焉 皇上天寶聰明過目成誦

六經諸史前數年卽能舉其辭然經義至深史書極博譬諸山海非一覽所窮此講習之事猶未貫徹者一也天下之蹟莫如章奏前者疊奉 慈諭將軍機處近年摺奏鈔錄講肄 皇上隨時披覽亦能一閱瞭然大而兵農禮樂細而鹽關河漕頭緒紛繁兼綜不易此批答之事猶未徧習者二也清語 國書我 朝根本 皇上紀誦甚博書寫亦工然切音聲義頗極精微固須名物靡遺尤必文義貫串滿蒙奏牘各體攸殊此繙譯之事猶未熟精者三也爲君至難萬幾至重多一日養正卽有一日之功加一日講求卽獲一分之益天下 祖宗之天下也 皇太后體 祖宗之心爲心二十餘年憂勞如一日倘俟一二年後 聖學大成 春秋鼎盛從容 授政以弼我丕基匪特臣民之福亦 宗社之慶也欽奉 慈福端佑康頤昭豫莊誠皇太后懿旨醇親王奕譞奏懇請體念時艱俯允訓政禮親王世鐸等奏合詞籲懇訓政數年伯彥訥謨祜等奏籲請從緩歸政以懋聖學各一摺覽奏均悉垂簾之舉出於萬不得已十餘年來深宮訓導欣見皇帝典學有成特命於明年正月內舉行親政典禮審慎宣綸權衡至當不容再有游移天下之事至繁至蹟皇帝親政之始容有未及周知全在各大臣共矢公忠盡心輔助內而樞臣外而疆吏均係股肱心膂之臣弼此丕基責無旁貸其各殫竭血誠力圖振作於應辦事宜任勞任怨勿得稍涉因循推諉致負委任皇帝幾餘念典本無止境一切經史之功繙譯之事尤在毓慶宮行走諸臣

朝夕講求不憚煩勞俾臻至善總之帝德王道互相表裏皇帝親政後正可以平日所學見諸措施用慰天下臣民之望當亦爾諸臣至願也該王大臣等所請訓政數年及暫緩歸政之處均毋庸議至醇親王摺內所稱宮廷政治內外並重歸政後當永照現在規制凡宮內一切事宜先請懿旨再於皇帝前奏聞俾皇帝專心大政等語念自皇帝沖齡嗣統撫育訓誨深衷十餘年如一日卽親政後亦必隨時調護遇事提撕此責不容卸此念亦不容釋卽著照所請行本日欽天監奏遵旨選擇吉期一摺皇帝親政典禮於明年正月十五日舉行所有應行事宜著各該衙門敬謹預備○戊寅諭都察院奏據湖北武生劉鯤等以書吏加徵錢糧勒派規費等詞赴該衙門呈訴案關書吏舞弊違例苛徵虛實均應澈底根究著湖廣總督湖北巡撫親提人證卷宗秉公研審務得確情按律定擬具奏原告武生劉鯤該部照例解往備質○己卯劉錦棠奏准軍機大臣字寄光緒十一年十一月二十五日奉 上諭譚鍾麟奏伊犁辦理屯田應派員督辦一摺等因欽此伏查伊犁爲北路奧區土膏沃衍泉源溝洫處處可通承平時於九城之地分置旗屯兵屯民屯回屯以資耕種邊氓相勸利莫厚焉亂後地畝荒蕪耕者不及十分之二且聽兵民自占舊時經界無可遵循現經錫綸派委三品銜分省補用知府王者彥按畝稽查以期集事惟委員之與印官其勢不相統屬譚鍾麟原奏請將各處同知均歸督辦之員管轄究係權宜之計臣愚以爲欲

厚民生須由郡縣欲增郡縣須設監司況新疆北路向設有道廳州縣現在全疆改設行省南路經營建置亦已三年各該地方官奉法順流與民更始其效較然可觀伊犁及塔爾巴哈臺等處原屬新疆北路輔車相依不容膜視請仿照鎮迪道之制增伊犁道一員駐紮伊犁兼管塔城事務改伊犁撫民廳爲府改塔城通判爲撫民同知加理事銜兼管屯田水利庶幾官事有聯而屯政亦因之具舉當與錫綸計議並函商明春均以爲然可否施行伏候 聖明採擇如蒙 俞允其道府以下等官應如何增設容臣與譚鍾麟錫綸明春等籌度情形詳細具奏仰 臣更有陳者伊犁幅員遼闊地處極邊該處增置旗兵屯地當時 諭旨有謂新疆重地武備最爲緊要此項地畝祇可專交閒散旗丁代爲耕種不當令官兵親身力作有妨操練等因仰見 聖謨廣運惟懷永圖實百世不易之至計今則邊事日多附近哈薩克又時有勾結游匪搶劫殺人之案若不從嚴辦加意操防竊恐民不聊生而屯務亦將終廢是欲興屯以足食必先設防以衛民否則利少害多民將不至也該處營勇現經 臣與錫綸會商裁併汰弱留強餉項照章發給誠使各統領營官激發天良認真訓練自可漸成勁旅前奉 諭旨錫綸到任後與劉錦棠和衷商辦務將各該營積習悉力翦除毋稍彌縫致貽後患亦不得操之過感別滋事端 聖訓周詳無微弗至此後宜如何策勵俾免疎虞是在錫綸隨時體察慎以行之得 旨覽奏均悉伊犁營勇現經劉錦棠會

商錫綸汰弱留強照章給餉自應隨時訓練俾成勁旅卽著該大臣會同該將軍督飭各該營官激發天良認真操練以免疏虞所請增減道廳各官係爲因時制宜起見著該部妥議具奏○諭軍機大臣等人奏黔省盜風日熾搶案甚多近則省城竟有明火強劫傷斃人口之事請飭認真整頓等語貴州軍務肅清已久游勇散練流而爲匪勢所必至全賴地方官隨時緝捕以靖閭閻若如所奏諱盜爲竊縱盜殃民各節捕務廢弛殊堪痛恨著潘蔚嚴飭所屬遇有搶劫案件卽行上緊緝拿不得稍有諱飾並著將于姓被盜一案飭屬嚴緝賊盜務獲懲辦原摺著鈔給閱看將此諭令知之○庚辰欽奉 慈禧端佑康頤昭豫莊誠皇太后懿旨醇親王奕譞奏重申愚悃籲請勉允訓政禮親王世鐸等奏再行瀝陳籲請訓政數年錫珍等奏揆時度勢親政尙宜稍緩貴賢奏舉行親政關係綦重各一摺覽奏均悉垂簾聽政厯稽往代皆出權宜之舉行之不慎流弊滋多史冊昭昭可爲殷鑒前因皇帝典學有成特降懿旨及時歸政此深宮十餘年來殷殷盼望之苦衷天下臣民自應共諒故於十四日王大臣等合詞籲陳均未允准數日以來皇帝宮中定省時時以多聆慈訓俾有稟承再四懇求情詞肫摯茲復披覽該王大臣等章奏瀝陳時勢艱難軍國重要醇親王摺內兼以念切宗社仰慰先靈等詞諄諄籲請迴環循覽悚惕實深國家值此時艱飭紀整綱百廢待舉皇帝初親大政決疑定策實不能不遇事提撕期臻周妥旣據該王大臣